

**Uunga siunnersuut: Inatsisartut peqqussutaat nr. Xx.xx 2010-meersoq pisortanit
ikiorsiissutit pillugit Inatsisartut peqqussutaata allanngortinneqarnera.**

(Illerfillu angallanneqartarneri kiisalu pisortanit ikiorsiissutinik tunniussisarnermi

piumasaqaatit erseqqissaavagineqarneri)

(Isumaginninnermut Naalakkersuisumit saqqummiunneqartoq)

pillugu

Ilaqtariinnermut Ataatsimiititaliap

ISUMALIUTISSIONTAA

Siunnersuutip aappassaaneerneqarnerani saqqummiunneqartoq

Ilaqtariinnermut Ataatsimiititaliap kingullermik suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit

Inatsisartunut ilaasortaq Jane Petersen, Inuit Ataqatigiit

Inatsisartunut ilaasortaq Andreas Uldum, Demokraatit

Inatsisartunut ilaasortaq Ruth Heilmann, Siumut

Inatsisartunut ilaasortaq Knud Kristiansen, Atassut

Siunnersuut aammalu ulloq 15. april 2010 UPA 2010-mi ingerlanneqartumi siunnersuutip siullermeerneqarnerani Ilaqtariinnermut Ataatsimiititaliamit sukumiisumik misissorpaq.

Siunnersuut pillugu

Aalajangiiffigisassatut siunnersuutip UKA 2007/123-p Inatsisartunit UKA 2007-imi akuersissutigineqarnera siunnersuutip saqqummiunneqarneranut tunngavigineqarpoq, pisortanit ikiorsiissutit pillugit maleruaqqusat malillugit illerfinnik angallassinermut aningaasartuutinik matussusiinissamut kommunit periarfissaqarput. Tamatuma kingorna siunnersuut oqaatsitigut erseqqissaassummik imaqarpoq, taanna malillugu inatsimmi § 8, imm. 1-ip danskisut kalaallisullu oqaasertai imminnut naapertuuttunngortinneqarlutik.

Taamaalilluni siunnersuummi matumani pineqartumi pingaarnertut imarisaasoq tassaavoq inatsisiliortut siusinnerusukkut aalajangigaannik atuutsitsilerneq, taamaannerani kissaatigineqarluni pisortanit ikiorsiissutit pillugit maleruaqqusat iluini illerfinnik assartuinermut aningaasartuutinik matussusiinissamut kommunit aningaasatigut killissaareersut iluini periarfissaqarnissaat.

Inatsisartut Inatsisissaannik Nalilersuisarfimmit allakkiaq tunngavigalugu siunnersuutaqqartoq saqqummiunneqarpoq aammalu siullermeerinissaq sioqqullugu siunnersummum iluarsiissummit tunniussisoqarluni.

Siunnersuutip tusarniaassutigineqarnera

Siunnersuut oqartussaasunut susassaqartunut tusarniaassutigineqarpoq. KANUKOKA-mit tusarniaanermut akissutigineqartumi isornartorsiuisunik oqaaseqaaseqaatitaqarpoq. Toqusup najukkaminut utertinneqarnissaanut peqqinnissaqarfik aningaasaqarnikkut akisussaasariaqartoq KANUKOKA-mit oqaatigineqarpoq.

Siunnersummik siullermeerinneq

Siunnersuut ulloq 15. april 2010-mi siullermeerneqarpoq, tamatumani partiit gruppia Inatsisartunullu ilaasortat tamarmik siunnersummum oqaaseqaateqarnissaminut periarfissaqarlutik.

Ilaqutariinnermut Ataatsimiitaliamit apeqquteqaat

Siunnersuut pillugu apeqqutinik marlunnik saqqummiussinissaq Ilaqutariinnermut Ataatsimiitaliap pisariaqarsoraa. Tamatumani illerfinnik assartuinermut assigisaannillu peqqinnissaqarfip inatsisillu allat, isumaqatigiissutit periutsillu iluini qanoq ikuuttoqarnissaa eqqarsaatigalugu. Apeqqutit akissutillu isumaliutissiissummut matumunnga ilanngussatut ilanngunneqarput.

Ilaqutariinnermut Ataatsimiitaliap oqaaseqaatai

Siunnersuut manna Ilaqutariinnermut Ataatsimiitaliamit ilassilluarneqarpoq. Inatsisartut siusinnerusukkut peqqussutaata 2007-imeersup atorunnaarsinneratigut toqusup qimatai illerfimmik assartuinermut akiliinissaminut periarfissaqanngitsut inuunerminni atukkamikkut ilungersunartorujussuarmik inisisimatilerneqarput. Tamatumani illerfinnik assartuinermut aningaasartuutinik matussusiinissamut periarfissap tamakkiisumik atorunnaarsinneratigut.

Toqusoq imminut pilersorsinnaanngitsoq aammalu pisortanit ikorsiissutit pillugit maleruaqqusat atuuttut iluini piginnaatitaasoq illerfimmik assartuinermut aningaasartuutinik matussusiinissamut annikitsuinnarmik periarfissinneqartoq Ilaqutariinnermut Ataatsimiitaliaq isumaqarpoq.

Pisortanit ikorsiissutit pillugit Inatsisartut peqqussutaanni atuutereersumi § 23, imm. 1-imut atatillugu siunnersuut isigineqassaaq, tamatumani ilisinermi aningaasartuutit naammaginartumik matussuserneqarnissaannut periarfissaqareerluni.

§ 23. Kommunalbestyrelsi ilisinermut aningaasartuutinut naleqquttunut matussutissanik pisortanit ikorsiisinnavaq, aningaasartuutit pigisanit akilerneqarsinnaasimannngippata toqusullu piumasaqaatit § 4-mi imm. 1 naammassisimappagu.

Aammattaaq illerfinnik assartuinissamut periarfissaq pisortanit ikorsiissutit pillugit maleruaqqusani maleruagassiornissaat Ilaqtariinnermut Ataatsimiitaliamit naleqquttutut isigineqarpoq, taamaalilluni kommunit taamaalillutillu innuttaasut assigiimmik maleruagassiuunneqarlutik.

Toqusoq danskisut innuttaassuseqanngitsoq aammalu Kalaallit Nunaanni aalajangersimasumik najugaqanngitsoq innuttaasallu nalunaarsorsimaffianni allassimannngitsoq maleruaqqusanut ilaatinneqarnissamut periarfissaqanngilaq. Taakku assersuutigalugu tassaasinnaapput angerlarsimaffeqanngitsut aallallu innuttaasut nalunaarsorsimaffianni nalunaarsorneqarsimannngitsut. Siunnersuutip matuma aappassaaneerneqarnissaanut atatillugu Kalaallit Nunaanni angerlarsimaffeqanngitsut innuttaasut nalunaarsorsimaffiannut qanoq nalunaarsorneqartarnersut pillugu nassuaateqaqqullugu Naalakkersuisunut ilaasortaq qinnuigineqarpoq.

Siunnersuummi saqqummiunneqartumi sangeeputaasoq tassaavoq inatsisit allat assigisaat atuuttullu, isumaqatigiissutit periutsillu nassuaatini nassuaatigineqanngillat. Tamanna pissutigalugu taakku pillugit Ilaqtariinnermut Ataatsimiitaliaq marlunniq apeqquteqarnissaminut pissutissaqalerpoq.

Maleruaqqusat isumaqatigiissutilluunniit allat illerfinnik assartuinermut tapiissutinik matussusiippata siunnersuummi maleruaqqusat atorneqarsinnaanngitsut Ilaqtariinnermut Ataatsimiitaliamit oqaatigineqassaaq. Tamanna pisortanit ikorsiissutit pillugit inatsisartut peqqussutaanni § 4, imm. 2-mi aalajangersakkamut atuuttumut naapertuulluni, taanna malillugu *pisortanit ikorsiissutinik tunniussisoqarsinnaavoq, pisariaqartitsineq ikorsiissutit allat atorlugit pisinnaanngikkaangat.*

Inassuteqaat

Oqaatigineqartut tunngavigalugit siunnersuut ilusimisut iluseqartoq akuerineqassasoq ataatsimiitaliamit isumaqatigiittumit inassutigineqarpoq.

Taama oqaaseqarluni Ilaqtariinnermut Ataatsimiititaliap siunnersuut
aappassaaniigassanngortippaa.

Debora Kleist
Siulittaasoq

Jane Petersen

Andreas Uldum

Ruth Heilmann

Knud Kristiansen